

- 1 wa-rbbi kiyi a-igan azwag-nnġ  
zġ-tasut n-tasutin.
- 2 ġ-ur-ta-luln idrarn ula tskrt akal  
tkkit-ttin bdda tgjt rbbi, ra-tgt rbbi dima.
- 3 ar-ttrarat imzdgġn n-ddunit s-wakal,  
tinit «wrryat a-tarwa n-bnadm.»
- 4 alf n-usgg<sup>w</sup>as gan ġ-izri-nnk  
zund idgam lli-izrin zund tasaet n-iyġ.
- 5 da-ttawit bnadm zund anggay n-wasif,  
nzri kullwaġ zund tawargit,  
zund tuga imġin zikk šbaḥ.
- 6 tmġi-d zikk tnkr tut s-ujddig,  
tsllaw tiqar s-tdgġ<sup>w</sup>at.
- 7 ntthlk s-lġaḍab nġuwġ ġ-ssḥt-nnk,  
8 tssbayynt kullu ddnub-nnġ ġ-lgddam-nnk.  
tzzudft a-rbbi ġaylli idln ġ-uwlawn-nnġ,
- 9 s-lġaḍab a-s-a-ttbbit tudrt-nnġ,  
zund tunfust ad-zrayn-uwssan-nnġ.
- 10 sa n-id-mraw ad-gan isgg<sup>w</sup>asn n-bnadm,  
nġd tam id-mraw i-yan iṣḥan.  
ur-gisn-nzzri abla takrrayt d-tmmara,  
ḥayna-s-tmman nayl zġ-ġi.
- 11 ma-issnn jġhd n-ssḥt-nnk a-rbbi?  
ma-issnn tiksaf l-lġaḍab-nnk?
- 12 sslmd-aġ a-rbbi a-nthasab ussan-nnġ  
afad a-iemmr-uwl-nnġ s-tḥkimt-nnk.
- 13 ar managu a-rbbi a-ra-ŋlannġ-tili tagat?  
ḥnnu ŋlannġ twrrid-d s-ismgan-nnk.
- 14 temmar-aġ zikk s-tayri-nnk izgan,  
a-nfrḥ ar-ak-nttirir kullu ussan-nnġ.
- 15 tfkt-aġ-d a-rbbi ussan l-lfrḥ  
unšk n-win-tgudwiw lli-zġ-aġ-tzzrit.  
tfkt-aġ-d a-rbbi isgg<sup>w</sup>asn l-lfrḥ  
unšk n-win-tnukmūt lli-ŋlannġ-izrin.
- 16 tmlt-aġ-d a-rbbi lquwwa n-iskkirn-nnk,  
tssbayynd-d lmjd-nnk i-tarwa-nnġ.
- 17 a-ŋlannġ-yili-ufulki n-sidi rbbi,  
tbarkt iskkirn n-ifassn-nnġ.  
d-iskkirn n-ifassn-nnġ, bark-tn a-rbbi.